

四明叢書

張宗祥

杲堂文鈔卷六

甬上李鄴嗣撰

姚江黃宗羲選

墓誌銘

驃騎將軍南京親軍衛都指揮使參將純甫李公

墓誌銘

余嘗遇勳門諸子孫輒問其伐閱始封率多出靖難功臣後較諸開國勳十居其七因伏念高皇帝丹書所誓功在萬世卽自後所靖家難而剖符之盛翻出其上每

慨然久之以是遇開國諸世家後益曲詢其先世戰功
本末其子孫能著忠義大節足重書太常每益詳敘其
事俟異時史官採錄未嘗敢畧焉今所銘都指揮使李
公其一也按狀公諱敷榮字純甫其七世祖諱辛肥鄉
人徙居淮西從高皇帝起兵常以偏師與大將軍俱初
破吳下楚數陷陳復從定中原征北平有功歷官應天
衛指揮使世襲永樂元年左遷本衛指揮同知世襲如
故至公父諱正道中庚戌武進士再遷河南都使司以
稱疾自解官歸里都閫公性愛閑散雅飲慕蘇黃文字

嘗小築鍾山之西植五柳于門蕭然自喜子二人公即
其長君也公生而嶷然性沈毅寡言初學易兼授春秋
習公羊穀梁二傳年二十二補諸生意更從制科起家
時在崇禎庚午國事方急南京內外守備大司馬並議
大舉將才于勦門益重公遂棄諸生應舉以京營指揮
使出衛孝陵公在寢所嘗聞鍾山夜哭輒起束帶坐唯
與大司馬史公言之謂留京國命所基宜豫爲之備未
幾聞三月十九之變史公以公惴惴深倚爲重再遷親
軍都指揮使弘光皇帝至江上羣臣奏迎入大內暫居

司禮監公率禁旅六千人入清宮時宮中閉久積苔蘚至數寸森陰逼人公督禁旅盡日事掃除凡數月上始入居武英殿公身出入禁中見國事漸壞嘗翹首望鍾山泣下已而江上警書沓至公以參將領火器軍出守新江口公爲將刁斗甚嚴然能善撫其下既至江口建纛益多張旗幟藥火聲轟轟江水俱沸議者謂緣江諸防以公爲第一而守京口大將已降諸將兵盡潰公大慟曰事敗矣遂抱其所建纛自投于江將士競赴水負公出以肩輿掄至牛首山寺始各散去公匿跡梵舍食

有令百官出註名凡將兵在外者繫其家人公念都閫
公老家居恐爲累因著葛巾入城遙望見宮門輒氣噎
嘔血數升從者扶歸家以病告得免而公竟不復鹽沐
時黜門已斷廩給公病甚召問家人曰所儲廩米尙可
給幾何曰可食三十日公喟然曰幸受國恩十世飽祿
廩臣尙得稍食以死今將餘此使子孫世復有祿遂閉
氣而卒時在九月十一日遺命以處士衣斂語不及他
事公至孝家居日間都閫公大淑人起居宛宛色養與
二仲處篤友愛爲人執禮甚謹尙澹樸生平不置妾媵

家無贏財配淑人仇氏甚賢與公相敬若賓有子曰緯
公卒時緯年甫十一淑人教緯使讀先世遺經學史被
服從儒生緯遂成令器淑人身主家事門戶飄搖竟得
立後公歿六年乃卒合葬鍾山先塋之北緯年既壯
益有名贊爲淦大將軍壻因客于鄭與余同居城東一
曲巷余喜緯開國功臣後且賢者遂與論交時訪其先
世軼事緯因具公狀流涕曰先將軍殉國三十年願得
先生之文鑒諸幽石庶足慰地下余謝曰某失職之人
名不出兩上豈足爲先公重緯再拜請曰此先志也先

將軍垂歿戒子孫無得乞當世貴人作誌傳今得臬堂
之文先將軍瞑矣余乃不辭爲敘次其事而銘之曰
前人勲在開國後人義在殉國祖孫一氣遠相屬將軍
魂赴山庭哭石馬失聲翁仲伏曰鸞飛飛去將復將軍
魂行重建譙更起大墳立祠屋神道高碑下馬讀高祖
功臣後當錄

孝廉萬先生墓碣銘

吾亡友孝廉萬先生卽甲申以前南方名士所推甬上
萬子而丙戌以後遺民故老稱爲梅菴先生者也先生

名泰字履安本定遠人徙于鄞自其始祖明威將軍至先生十一世前十世俱爲將以忠義世其家至先生始以文章名世應制舉俱詳墓誌中先生生有異稟美風儀進止不失尺寸少補郡諸生與里中陸文虎交同研席不間寒暑兩人並以風格自高善激揚士類有盛名卽三吳諸君亦遂循出此兩人下歲丙子先生舉于鄉先生有族父曰燁尙履公主主賈而都尉雅折節喜士先生旣至長安則館其家都尉爲先生盛帷帳其具出從車騎使遊諸老先生間名益藉甚憶余初客西陵先

生亦自長安還因得通刺望見先生風貌高談如雲座上
衣冠輻輳余時年最少客嶺外久無所見聞初不知
里中有奇偉如此人也然先生嘗對策者三俱罷歸而
甲申之難作南都定策姦人執魁柄諸大臣相繼去位
初閹孽有居南都者其人權譎工辟倪伺國家有變南
方諸名士憂之因作留都防變揭目遏其謀萬陸俱列
焉閹孽銜之至骨至是旣起用事逐諸大臣方案前揭
欲盡殺南方名士刊章下捕余時與先生俱客都下聞
其事各變服潛出都門事未發而南都遂陷先生杜跡

里門江千義師起文虎出爲行人先生亦授戶部主事
兼曰講官先生獨衛不受復一年江千師潰先生繭足
走山中遭太夫人之喪倉皇卒事凡先世祭器遺書一
時蕩燬文虎復死先生哭于埜慟意忽忽自失瘡鬼來
侵形神枯廢適郡中有大獄高中丞先儀部爲之魁余
輩同繫者數十人先生在病中蹶然起曰吾不一行大
旤不解豈可使賈偉節笑人因芒屨間道渡西陵而先
儀部已畢命從人倉卒尸臥地不收先生立爲營衣被
棺木目至飯含之物無不具而高中丞與余輩竟藉先

生力得破械出未幾復以奇計救姚江黃晦木得不死
當是時傳先生義聲人爲震動初文虎爲人性激亢疾
惡如讐先生雖與齊名而持論不尙危覈故後輩多親
之文虎歿後先生更與里中徐霜臯高辰四旦中及余
爲忘年交其數晨夕先生末年作詩善法韋柳日與數
子相酬答而先生所心折者爲姚江黃梨洲先生時單
舟造祝橋數日而返一時失職之人及諸耆舊俱眎先
生爲斗極趨集其門先生嘗一客嶺外舟還有毛汧者
與先生舉同年道病瘞且死舟人俱欲棄之先生不可

身爲調藥餌時其起臥汧得生而先生遂病不起卒年六十蓋先生性篤于朋友竟與相終始悲夫悲夫論者謂丙戌以後先生不赴公車歲寒之節以是重先生而余獨謂未然夫出處至大凡讀書處知大義者皆能辨之況萬氏勳門十世先生模楷爲一世所宗豈至失身于此余故曰斯未足爲先生重歟是先生負經世之才三上公車不第南都重建先生喟然負經世之策而復使匿影銷聲幾不免闖孽之手鶴髮江湖羈魂飄泊斯足爲先生惜然自兩都繼覆剖符子孫淪失艸莽幾不

可復問而先生有丈夫子八人恂恂孝謹多能傳先生
學雖貧無一區一廛而七葉並興所見開國世家人文
熾盛未有踰萬氏者斯又足爲先生慰爾按萬氏墓在
鄞者自第二世始時死國事者三人俱不得喪還家人
爲招魂葬其冠劍于西山之原先生歸置卽葬祖壠之
側山中人曰異時先生常立墓旁大樹下手指劃地形
謂其法可葬此語家人俱不知及封蠶卽先生所指處
也梓里黃梨洲先生旣爲誌其幽石而先生諸子復乞
余爲文表諸碣余重感先生義執筆慨咽忘其不文重

系之銘曰

南乃品目昔推葛陸不畏強禦陸如仲舉天下和雍君
爲林宗陸嘗一出鳳衰見翮惟君保身龍隱其鱗初始
之成義熙之潛于義斯得喟彼邦國西山有原萬氏遺
阡招魂三世冠劍所瘞蜀笥氣寒翁仲毅顏先生歸骨
爾祖之側悲風颯來靈旗夜迴岸谷後改斯銘常在

前太常寺博士王無畋先生墓誌銘

歲在辛亥二月里中前兵部員外郎高隱學先生倡爲
耆舊集凡士人徐我庸先生第一王無畋先生第二丘

含三先生第三俱年七十諸先生俱六十以下惟僕年
五十最少許得從杖履後意謂使三先生齒近胡司馬
吉尉卿則僕亦過盧尹狄祕書之年矣故得與會焉諸
先生每月一集集必有詩藉相讌集撫掌以樂其西夕
之年而吾黨後起得望見老成人風貌如德星吉雲以
爲里中光華斯可謂盛集矣及是歲盡丘含三先生卒
子家諸公哭之爲輟會者數月至壬子五月十四日始
復集于城北倪氏家前此諸集卽風日佳時常有一二
人不主獵此集以相闊久故諸公盡來驩笑竟日各以

次別去惟僕與王先生俱家在城東因得相從步還復失道迂行數百步始得至王先生所居巷乃與別後二日王先生以暴疾卒僕適入太白山歸先生死三日矣痛矣乎夫以諸先生放棄垂暮爲天地所遺今幸與二三老友杯酒雍容風流日接而復若有物以嫉之使方失一故人復失一故人高春再斜碩果雙落仰詠皇天不敢置問然猶藉有斯集使高賢畢會布席行觴若知王先生將歸自然之室聚送長辭而僕復與款款行路敘其餘情以畢此平生之驩此則由王先生性篤于朋